

戚少保年譜耆編

戚少保年譜耆編卷之四

閩嗣祚國彙纂

緹嗣昌國集錄

廩嗣報國詳訂

庠嗣興國叅較

嘉靖四十二年癸亥家嚴三十六歲

春正月再奉詔命援閩

時閩寇復亟襲陷羣邑御史李邦珍題奏調兵往
援上申命家嚴統督所募募兵馳閩建功以副委
任閩中丞游公待罪行間仍簡二華譚公于墨纒

奪情撫閩同往視師時倭已據興化兩月而諸兵
屢北總戎劉公纘俞公大猷各尾賊距壘五十里
莫敢逼視惟相戒以待賊兵倭每詢人曰賊虎何
時來耶會賊中有傳賊兵來者賊于二十九日戊
申棄興化去路經崎頭民堡遂陷之又陷平海衛
城據之北路倭因而合夥于是泊船據海觀望虛
實以訂歸計劉俞二公亦移屯五侯山時撫賊許
朝光擁舟師于海洋雖陽爲阻截實陰助之

二月如義烏募兵

是月家嚴奉詔命入義烏募兵凡十六日而竣得

壯士萬餘人本兵楊公溥齎箋牘促進兵畧云朝廷用將軍知遇不輕卽領義烏兵速赴福建錢糧呈請浙江撫院暫處給部已發銀三十萬兩遞送福建矣只憂兵不必憂食也

三月兵入閩境抵建陽土寇當轍夜抵小湖盡滅之是月初二日庚辰同汪公發烏傷誓衆入閩郡邑士大夫共餞于郊師行將盡竟莫省主帥何在或曰雜偏裨去矣每過地方必詢賢者式廬而叩其蘊焉十七日乙未入閩境至浦城二十二日庚子抵建陽之陳埠先二日有山賊千餘突至水吉聞

大兵入境退避小湖鄉民遮道求勦家嚴曰吾奉命殲倭此非予責賊聞之喜遂不爲備時南明公先一舍行壁水吉迎謂家嚴曰茲蠢寇當輒必殪之而後哺食何如家嚴曰此不急擊將謂大兵不遑他問益成燎原之勢若再議進兵則糗糧騎從爲費旣煩而道路馳驅爲勞亦倍矣暨日暮密與汪公分軍夾擊之汪公統王如龍等三枝由戚公店進家嚴統把總趙記等三枝由水吉進兵士皆穿莽涉水夜抵小湖賊退壁民房拒截巷口我兵沖入合圍復攻以火焚燬甚衆生擒二十有三俘

斬獲三百一十有二級餘孽冒火奔匿山林者鬚髮盡燎次日悉爲鄉民所縛無一漏網比時沖鋒首功丁茂等陣亡則朱筠三人已耳當烏傷初發時首遣胡守仁等兵六枝先行既至福省中丞游公遽促守仁進戰以未奉將令不聽命馳報于家嚴乃上書解之曰守仁等兵先期而發方命于公非抗違也嘗讀兵法曰將能而君不御者勝又曰不知三軍之不可進而與之進是謂靡軍又曰知彼知己百戰不殆又曰百里而趨利者蹶上將又曰器械不利卒不服習以其卒予敵也本職叨司

將領統兵有年茲者選募而來知已頗真卽今舊
寇在平海者萬餘新寇在連江福清者亦不下數
千而在閩兵將雖有俞總戎新收漳賊六千以無
節制而不能交刃劉總戎所部屢戰屢挫所恃爲
一方性命以捍禦巨寇者惟此新募南兵爲遠近
內外之孤注耳今掣能將之肘不知其不可進而
強之進且利器未頒尙未服習敵情士氣如處暗
室乃欲以二千兵而禦新冠眾寡之不敵也明矣
況跋涉千里士卒虺頽且勞逸之不相侔又不止
百里趨利之戒也犯兵忌而希成功其曷能濟且

守仁等兵係萬眾之前鋒倖而獲捷亦不免于損傷使大眾失前鋒之恃或稍有挫折則敵愾之氣奪而萬人爲之解體且山寇視其成敗以爲叛服倭賊視其成敗以爲聚散兩浙視此爲神氣之壯弱八閩視此爲萬姓之存亡千係國事良匪輕鮮推原其故夷寇聚劫日久凡在官司左右不無奸細促之速戰又用以寡擊多實爲中彼內應之謀失此不言噬臍將何及也游公雖允罷孤兵先入之議而心中已有物矣

夏四月大捷於許家村克復興化平海崎頭郡衛城

堡

是月初八日乙卯抵閩省比士卒新至方望中丞
醜賞賈勇前驅游公乃反苛論家嚴時俞劉二公
部伍萬計共壘截寇中丞急督戰會有歐陽將之
失家嚴因上書大略請集兵持滿而發言甚切汪
公是之中丞公不悅因論別將有徘徊之句遂借
家嚴翱翔爲對夫賊陷郡縣諸城堡皆上冬春前
事家嚴尙在浙也新兵隨募隨發未閑軍政幸於
道途間寓訓練耳豈知良工苦心哉時中丞公猶
汲汲議禮直指公劾以辛苦相勞若將有言而不

能盡者幸覲馬鍾陽公公寒溫外卽問何以見劉君家嚴曰數千里赴義在舒閩急圖萬一涓埃之報卽折節何愛耶鍾陽曠然爲問曰公言及此可謂全閩之福矣直指聞之喜動顏色及十一日戊午新中丞譚公至建圍犒士督發卽委汪公監軍十三日庚申抵福清賊聞戚公至強半下舟賂許朝光縱路歸國止留精點三千移巢渚林迤南許家村據險結巢又公劄赤崎山下聯絡爲犄角之勢家嚴乃揭請譚公畧云本職今已馳至福清必本部院親臨方趨平海合營緣二總兵在彼職兵

一到彼必趨戰抗之則非體聽之則掣肘進止不
一散亂無紀三家之兵旣雜則互推之隙可乘萬
一少挫全師奪氣大事去矣卽或倖勝而利之所
在爭級競財棄賊而自鬪者有之必候本部院親
集三營將士插血立盟分定道路約以機宜進有
後先專責沖鋒懸以重賞爭級搶財者立以重禁
斯可以萬全而無害也十七日甲子大兵趨烽頭
十八日乙丑過黃石十九日丙寅抵東停家嚴微
服往覘賊壘還謁俞劄二公二十日丁卯新中丞
譚公偕汪公同詣潛林會集三大營部署機宜家

嚴進曰俞劉二君拒賊數月今一旦取而有之彼何以堪願請身當中哨劉俞犄角功賞共之不敢顯譚公卽親諭二公以家嚴部爲中哨沖鋒懸示賞銀二萬兩二公所部分左右哨爲犄角之勢議以沖鋒爲最首級弗尙也定以二十一日戊辰進勦甫及四鼓以守仁前倡家嚴督後兵分三路銜枚而進及五黨山側嶺月猶明台坐待月落乃乘昧爽直薄賊所隨有賊二千前鋒百餘悉乘馬併力沖突我兵環山飛炬擁隊鏢鉛馬驚賊潰步倭短刃相接鏖戰踰時羣醜股慄愕然拊心曰戚虎

今果來耶大敗披靡有跪伏乞死者徑追至許家
大巢四面合圍血戰乃因風縱火須臾巢穴盡掃
積尸充雷難以數計時日方已晷克收全捷計擒
斬共二千四百五十一級奪獲夷器三千九百六
十一件印信一十五顆盡還與平之俘釋男婦三
千餘人凡婦女之裸體跣足者俱給衣布而遣之
其屬名門者更加隸護送所獲財物盡賞士卒絲
毫不取比時衝鋒者婁子和等陣亡者金漁等一
十六人其亡命餘孽次日發中軍總哨胡守仁等
兵分伏要路追勦擒斬一百七十一級當事者欣

然勞功家嚴獨愀然有松柏之下厥土不肥之感
次日凱旋入郡掃腥穢飾廨宇招撫流移安厝民
祉芾陽之民乃得再見天日矣二十七日班師入
福清路徑林墩之墟屋宇復清田圃如故盡老幼
捧茶果擁獻馬前且拜且歌曰生我兮父母長我
兮疆土生我不辰兮疆土多故奠我再生兮維戚
元輔於皇元輔兮允文允武繫我今日兮漢儀復
睹

都御史譚公捷疏略云臣惟蠢爾倭奴突如內犯
襲我郡衛辱我冠裳虔劉我人民占據我城池流

毒已經數月被害奚啻一方今乃仰仗皇上聖武
廣運廟謨審固文武同心將士用命遂使莫敢誰
何之寇不崇朝而授首既陷被據之城以一鼓而
克復全閩安堵萬姓騰歡是皆威某之功云云
五月連捷馬鼻肖石嶺等處克復政和壽甯二邑

初政和壽甯倭支黨四百餘眾合船自甯德開洋
因風逆食少復由福甯之高羅登岸至甯德龜山
寺山羅源連江突至北嶺欲拔平海合船及聞平
海已定遂退連江之馬鼻初二日家嚴督軍襲之
賊聞大軍將至艤舟十二艘擬乘潮開遁馬鼻去

縣六十里重山疊嶺懸海孤嶼間止一徑可通羅源乃于次日預發義總王如龍等三枝趨羅源以遏北遁親督大兵涉重山攀壁嶺時暑氣炎蒸登危觸熱兵士疲勞劇甚比抵沙街正際潮長恐賊乘潮驚遁姑休兵秣馬候之會偵諜義總孫廷賢等還報巢有二路可入乃發胡守仁等三枝爲奇兵竊由左路緣山而進陳祿等三枝爲正兵明由右路沖鋒而進候至日晡潮涸然後申令進兵鼓隊長驅賊見右路兵至先遣黥賊一枝乘暗趨左路欲抄截右哨之後不知適與兵之左路者相當

胡守仁率眾短刃相擊賊敗回巢我兵右路齊至
并力夾攻倭皆熟諳鎗法亦知死地于是四出血
戰我兵殊死奮擊乃大敗之賊遂退據高山矢石
並下我兵仰追履險如坦一擁而登斬馘將半西
日漸沉餘賊奔海投船已先分遣義總傅應嘉率
舟師從五虎門入焚燬殆盡賊計促併入海塗陷
泥淖中因而窺身避匿夜不及剿分兵劄守水次
夜半潮湧漂溺無算計擒斬共一百五十七夷救
俘係男婦二百有三人奪獲夷器一百九十有奇
比時沖鋒者陳祿等陣亡者陳遠等數人而已都

御史譚公捷疏云官兵自平海大捷以來勇氣百倍至于舟師最爲廢弛亦各感奮兵興敵愾之心各處新舊倭寇不旬日次第報平遠近懽騰地方

○謚時亡命匿山潛奔漏網者百餘徒欲仍復回政和覓山賊合夥初九日丙戌屯龜山寺家嚴差義總孫廷賢錢助禮等裹糧督兵偵尾賊後初十日丁亥卜易得澤山咸卦百戶陳文治占以壬寅日申時賊來就我當奏太平之捷蓋以日當亥水土爻與火鬼併發是旌旗發動而子孫且直日又火絕于亥此乃必捷之兆但時屬鬼旺之令且生

于化爻當匿于深山未能卽滅至壬寅日鬼化乾地與四爻亥水子孫相逢化爻元辰俱絕于寅是日申時賊當就我而俛首伏誅矣據丁亥去壬寅尙有十六日家嚴未信有頃偵報賊懼兵威隨剽隨遁潛林伏莽朝東暮西浪跡遊魂倏忽不定家嚴恐其內流日深乃集論士卒而鼓舞之於二十日丁酉發自羅源露宿圍德而偵報賊在閩坑乃行圍德尹林公應芳督東洋鄉兵并龜山寺僧民各以家嚴旌旗張疑堵截泰順之路又令義總樂垵屯截福安比因山險難以用眾隨通營合選精

銳三千以百戶哨官張元勳丁茂童子明等屯截
龜村義總趙記等屯截霍童以王如龍等兵隨中
軍進剿二十三日庚子卽圍德拔師由僻山曲徑
以進沿途皆懸崖峻嶺匝樹盤枝輿馬不通家嚴
親歷跋涉足被棘刺亦所不顧次日辛丑抵銅銃
渡又報賊遁梅山去我兵益遠是夜遣人密諭孫
廷賢我兵已議次早進發須於龜山等處令原行
設疑僧民鼓噪驚賊南趨否則益以北下尾追無
及若過宵石將近尤溪一與山賊合黨兵日勞而
賊日熾矣廷賢如令二十五日壬寅晨賊果驚奔

南下哨官鍾三九從便徑飛報家嚴卽令王如龍
陳濠等偃旗疾趨霍童賊已超肖石嶺矣其嶺形
勢崔巍崎嶇萬狀賊屯嶺頂謝姓大家自謂絕險
無虞刳牲爨金爲夜遁計是日申末王如龍所部
由茂林中正路而上陳文澄所部由左路而上陳
京所部由右路而上皆依茅攝形賊不之覺四面
合圍乃于屋後舉銃而喊噪齊震賊亦喊出前門
迎敵如龍等率眾死鬪數合燼其後屋風狂焰烈
賊奮勇潰圍我兵徐受八等登屋礮瓦奮力夾攻
大兵乘勢擁入斬首一百有八級餘孽四十餘人

悉投火自焚其日正壬寅也比時首功者徐壽等
陣亡者陳忠孫等數人而已會夜晦路險諸兵草
棲遲明乃凱旋是役三捷興平之徒和圍之黨俱
無生還除鄉兵標兵斬馘數百外通共水陸擒斬
山倭二寇一千六百八十有九級焚溺萬計奪獲
器仗共四千有奇印信一十五顆釋救俘係男婦
三千有奇恢復一府二縣三衛而八閩底圍矣海
口童謠曰戚我爺戚我爺爺未來兮民咨嗟爺既
來兮兇妖蕩盡草木生芽欲報之德昊天無涯願
爺孫子繩繩兮爲公爲侯永定國家

六月兩臺題敘閩功進都督僉事尋陞都督同知磨
子正千戶賜白金文綺有差

是月閩直指李公邦珍題敘上年橫嶼四捷功次
疏略云智兼萬敵勇冠三軍秋毫無犯士卒爭獻
以壺漿奮勇先登倭奴遙聞而號泣揮戈四出收
捷萬全誠爲曠世之奇勲無忝明時之良將所宜
超格陞賞者也疏上詔陞署都督僉事仍賞銀三
十兩

閩中丞譚公題敘興化平海大捷功次疏畧云鞠
躬盡瘁用兵如神馭衆而分數愈明取勝而機事

益密批亢擣虛彼醜畏之如虎除兇雪恥斯民望
之如雲全師奏凱兵不留行一戰成功賊無噍類
豈直當今之虎臣實爲振古之名將

直指李公又題敘前捷疏云心存保障以一夫不
獲爲已憂志切安攘以纖惡必除爲已任居成功
而不自滿假急從事而不違圍居潛軍破敵有如
入蔡之師冲暑臨戎無忝渡瀘之役勞深百倍功
已萬全

兵部覆勘云倭患起自嘉靖三十五年舊寇方剿
而新冠復來東隅少圍而西隅又失始而劫掠庄

村四野一空已而攻陷城池闔省盡震竟至興化之變從來未見衣冠之禍慘毒極矣獨賴副總戚某募兵往勦一鼓盡滅看得此一臣者算神百勝勇踰萬夫超距先登獨入豺狼之穴挺身力戰共稱熊虎之才功當首論宜加陞賞廕敘奉旨天地宗廟垂佑八閩底圖擒斬甚多功委可嘉戚某陞署都督同知廕一子原衛正千戶仍賜銀三十兩綺絲二表裏時仲叔柳塘公郡文學也欲舍於國庠乃舉俸金五百俾之爲資且行而恩命適至仲叔欲焉隨承前廕檄入閩以從戎事後以斬馘功

亦得世襲登州衛指揮僉事

秋八月娶宜人沈氏

浙江直指張公科疏薦云貌若儒生而出之以真
敢必實忠義而佐之以智謀料夷情不出其範圍
身經百戰而不困連機籌俱操乎獨斷勇冠三軍
而有餘夙勲已隆於兩浙新功克著於八閩允稱
東南之元勳無忝古今之名將宜登總帥之任用
展統馭之才疏上部覆附簿推用

秋九月定番休分布水陸要害以防秋汛

初家嚴出浙人心向屬維繫今任閩與浙勢不相

屬而見在將士不過畏國法及念舊義而已以不
相聯屬之勢而加以違土思歸之情兼閩餉又乏
遂將本部萬餘人分兩班番休更戍見班止存六
千四百員名是亦不得已之計也時值九月風汛
已迫錢糧不給原議烽火小埕南日浯嶼銅山五
水寨一時船艦未能遠備隨行原任鹽運同知劉
公汝順先將近北一帶烽火南日小埕三寨見存
兵船增脩已完九十二艘乃選集兵將而分布之
以福州衛指揮朱璣署烽火門把總泉州衛千戶
傅應嘉署小埕把總各領大小兵船四十艘浙江

松門衛千戶顧奮署南日山把總領船十二艘各
給器械火藥糧餉發信防海焉其見存陸兵六千
四百人分爲八營以義總金科葉大正二枝兵駐
福甯州守北路署守備胡守仁統義總陳應潮朱
珏方奇二枝駐福清縣防中路原任都司署守備
耿宗元統義總暴以平胡仲膏二枝駐漳泉防南
路百戶陳其可統軍門標兵駐連江翼護省會家
嚴親統義總趙記陳良琮二枝往來調度以防陸
路

浙直指伍公典疏薦云武將而豁似文儒戎事而

處以軍禮容貌不踰中人而心雄萬夫智料常中
機先而勝決千里賞罰嚴明軍民雜處而秋毫無
犯謀猷遠布旌纛所指而戰陣有功歷年浙東頻
伸撻伐之威近日閩南屢收攘斥之效乞俯徇輿
情俟其刼虜之後錄其積戰之勲特加總兵之任
處之台温之間俾得專制閩域以爲兩浙之長城
控帶泉興以固八閩之保障疏上部覆酌議推陞
上允從之

冬十月島夷紛登水戰六捷陸戰六捷遂搗平之
前犯平海之賊所掠寶貨充溢于是島夷歆動遂

鳩合夷黨二萬七千餘徒大舉入寇議以今汛先
發一萬五千劫仙遊餘俟來春大舉蓋將垂涎省
會也時孟冬初三日戊申有倭舟十三艘駕至臺
山乃趨烽火門署把總朱璣督千戶陳聰等舟師
奮勇犁沉綉鞋船一艘餘寇怖怯遠遁我兵乘勝
追至東北外洋又燬巨艦一纜焚溺二百五十餘
徒斬首十一級是日又流夷舟十餘艘駕抵官澳
係小埕信地趨本汛署把總傅應嘉督武生粘席
珍等舟師追至東礮外洋犁傾巨艦一艘焚溺百
餘徒值夜颶風作不得取級止生擒善水真倭一

名初四日巳酉大竿塘海洋夷舟七纜浮洋南下
係烽火門信地乃趨本汛朱璣督百戶張威等舟
師追至臺山外洋先傾巨艦一艘繼又攻殞小舸
二舫斬首三級生擒九夷沉溺三百餘徒諸餘孽
驚悸回遁內二艘合艚約倭百餘駕至福甯之三
沙焚舟登岸於初五日庚戌突州之東門竊攻福
圍家嚴預分義總金科葉大正等拒截而分守道
金公淵又發守備羅章佐力摧賊鋒羣醜敗北追
及池嶼科擊其蕭大正尾其後前後夾攻斬首四
十有九級餘賊奔匿民居恃高爲險我兵合圍自

屋後舉火賊悉觸焰無餘比時當鋒者金科等陣
亡者隊長吳奎夫三人又前官澳海洋敗倭二艘
約賊百餘徒登犯長樂之大址流至福清大石邱
時已預分部署守備胡守仁義總朱珏方奇陳應
潮等駐防于鎮東衛初六日辛亥守仁督兵迎至
石邱賊方據民房爲大逞計聞兵至卽列陣出迎
精悍善鬪自午至酉數合乃敗復入民房墜壁不
出我兵登屋揭瓦逼以火藥出門復戰敗之斬首
八十有四級南日署把總顧喬亦督水兵登岸協
勦二級餘賊焚燬殆盡潛逃數賊爲鄉兵零勦前

賊盡絕是日復有倭舟十六艘流突臺山仍起烽
火門署把總朱璣督千戶陳聰百戶張威馬雲鵬
等舟師追至七星海洋攻覆大艦一小舫七生擒
二十有三夷斬首一十三級沉溺五百餘徒其日
又流泊倭舟七艘夜登福清石邱澳一艦突入萬
安所連盤澳俱然舟登岸約賊二千餘徒家嚴得
報於初七日親督義總陳計陳良琮等兵馳至福
清與胡守仁朱珏方奇陳應潮等合營協剿家嚴
度賊焚舟志必深入流突興泉尋鯨合黨則上逕
橋爲必由之路初八日癸丑夜乃伏兵漁溪令守

仁親掌號礮待過半發伏賊必擁退則橋窄勢窮自相擠落港潮可不戰而盡溺也至初九日甲寅辰時賊果合夥徑突上逕橋守仁舉礮太早我兵伏發賊得速退擠落數百醜於橋下時值潮湧俱溺漂外海當陣馘斬首鋒黥賊九十有二級奪獲器仗一百十有餘件餘孽潛由別路南遁惠安之東沙開洋而逸是時島寇南北紛登將圖大舉不意水陸備禦防保無虞但浙兵分成各地除病傷見在堪戰不過五千勢薄力弱終不能大創非全策也乃請於中丞公委泉州推官鍾公崇文都事

何季春齋安家銀餉赴浙催取踐班官兵兼程協
剿而中丞公尋亦親統標兵義總蔣清百戶陳其
可馳至福清會議戰守會有倭舟三艘浮東礮外
洋乃趨小埕署把總傅應嘉督李勝蛟張楠等舟
師追至白犬適遇大艚賊舟二十餘艘我兵奮勇
力犁八艦漂溺數百徒計生擒三十五人斬首一
十七級奪獲器仗八百一十四件其日又流夷舟
三艘突至福圃舊水澳賊半護舟半登岸復趨本
汛署把總朱璣督千戶劉梹百戶馬雲鵬掣船埋
伏仍調水兵登山鼓噪賊驚潰隨返舟開遁外洋

又倭舟三艘登犯晉江福全千戶所圳上澳趨署
南路守備耿宗元督副總滕易楊世潮等兵連夜
追及南安學前橋陸戰斬首二十九級泉州衛指
揮白希周統領民兵協戰斬首百餘顆餘賊散遁
爲滕易哨兵斬二級鄉兵曹思遜等鵬剿四級初
十日乙卯倭駕雙桅巨艦六艘登犯平海衛後潘
澳又雙桅巨艦三艘登犯福甯間峽澳乃遣義總
金利葉大正部陸兵夜追至漁溪陸戰飛鉛連斃
數賊賊敗奔南平路而遁是日又倭舟十一艘流
突星門乃趨南日署把總顧喬督哨官陳伯秀張

榕等舟師追至東山井門外洋犁傾六艘沉溺四百餘徒生擒十有七俘斬首三十七級鎮東衛千戶協戰亦斬四級餘黨悉平

上疏請重將權益客兵以援閩

竊念臣一介武夫簡因軍功謬叨聖寵寄以一面勉竭駑駘但倭奴驚悍技精須用素練節制勁兵以五當一始爲萬全其連年調剿隨向克捷者良由軍門付臣以萬餘教練所致至于統督經過秋毫不犯旗鼓一臨眾莫敢後又由臣任浙江台金嚴將領與兵備道協同地方親入眾兵之籍一切

頑梗奸宄之徒逃匿之弊皆得併其妻孥制其死
命故能得其死力今春因破府衛巨寇奉欽依新
舊增募一萬餘名赴閩仰仗天威克收全捷亦臣
初出浙江人心尙屬維繫今任福建與浙江勢不
相屬而見任兵士不過上畏國法及念舊義而已
夫以不相聯屬之勢而加之以違土思歸之情兼
閩中兵餉計日可乏遂將部兵議分二班止留六
千防守秋汛是亦不得已之計柰何閩地三面濱
海前兵分布三路愈見單弱近十月內節據福清
泉漳興甯等處報稱陸續登犯雙桅倭船共大小

六十八隻前後倭寇二萬有餘緣臣部兵旣勢單於分戍又病傷於久勞十人之中瘡痍過半軍門調度宣布天威鼓舞再奮於是水陸共奏一十二捷擒斬焚溺三千餘徒而兵士勞病戰傷又去其半前項警報捷文俱附在卷案可証無柰賊日沓至兵力有限今戰勦不盡之倭尙有萬餘見攻仙遊縣城臣以疲兵再加選料兵雖至愚亦知眾寡莫敵其應踐班浙兵又皆爲所隸邑治百計阻撓而沿途設禁不容入閩無怪乎兵懷故土如驕子而不可用也今臣仍一面督整疲兵聽奉軍門親

調度相機鵬剿恐終不能一鼓卽收全功縱使身
殉馬革何補於閩計今見在賊數非精兵三四萬
不克蕩平欲行赴浙調募旣明禁於官府又暗制
於有司臣以不能制其死命之權而用思土畏戍
之士求必得其死力誠未見其能濟也設使奉旨
召集亦須用舊頭目恩重法輕情義聯東而閩浙
山川險阻又二千餘里兵衆日行僅可二舍亦恐
遠不及事而況有此分限之艱難乎但思八閩萬
一不保亦不免賴浙江江西廣東三省兵力以圖
恢復與其收功於焦頭爛額之秋豈如早爲曲突

徒薪之計其間難易輕重不待智者而知也又查
閩中倭寇於上年攻破興平府衛僅五六千之數
今年則二萬有餘設使倭再獲利而歸必空國入
寇且八閩之禍不在倭夷而在山寇與腹心之間
其山賊之消長係於倭寇之有無苟兵力不濟威
名少挫倭夷空國而寇於外山寇乘隙而生於內
八閩立有土崩瓦解之勢矣又據獲到賊中被擄
人林三供稱今年倭賊共有二萬七千先來明春
尙欲大舉今秋汛所登之數及在海未登節報船
隻其言頗驗則明春之說似爲可信伏望皇上軫

念八閩爲浙江唇齒財賦相隣之地處臣以統一
浙福之責重以節制調度之權使太阿之柄務歸
將領庶法重而心齊威尊而令舉又通以遊援之
法順其重土之情斯人人樂爲効用可以解目前
之危急待來春之劇寇庶幾其有濟也若仍以臣
匏繫閩地羈縻久客孤兵冀出死力迅掃強奴所
謂置飛翼於叢林驅虎豹於江澗實非臣之所能
也

初譚公與家嚴議水陸備禦機宜家嚴曰水營五
寨當以烽火南日活嶼三艚爲正兵銅山小埕二

勝爲遊兵分信地明斥候嚴會哨賊寡則令各白
爲戰賊衆則合力併攻以扼之於外洋然五寨之
形勝有緩急而多人之才譔有大小又當以才器
使五寨中惟小埕爲省會門戶非應嘉不克肩次
則烽火門魏宗瀚可用也又次銅山則鄧銓宜之
又次活嶼則秦經國宜之又次南日則羅繼祖宜
之若陸路原額設叅將與本職銜不甚遠雖勅准
簡制而終屬尾大不掉何如改設守備卽部中選
其才優功高者充之庶臂指相使而無掣肘之患
惟王如龍才堪北路胡守仁才堪中路耿宗元才

宜南路於閩縣南臺當開設鎮守武場及監軍公署公同調集合營訓練風汛之日乃分布四出水陸防守聽各該道監督掣汛無警而合營團操則號令出於一人臨機有事而畫地分守則司任庶有專責職亦得指揮如意而智力可盡展矣譚公善之

冬十一月詔陞總兵鎮守福建全省并浙江金溫二府地方都督水陸諸戎務

巡撫福建都御史譚公題八閩善後事宜疏云知兵之將世不多有治標之事難執一方亦惟隨時

措置有益成事而已今照分守溫處福興副總兵
戚某忠誠懋著文武兼資貌雖不踰中人才則可
將十萬南北將官號爲節制之師而收堂堂正正
之效者誠未見其比也第其秩雖都督官纔副總
殊未足以展千里之才慰八閩之望臣謂宜以戚
某充總兵鎮守八閩并浙江金溫二府仍以部下
曉暢兵事屢立戰功者分補南北中三路改爲守
備庶平時兵知將意將識士情而臨事如身之使
臂臂之使指誠爲計之得也疏上命下陞總兵官
管轄福興泉漳延建邵武福寧等七府一州并浙

江金温二府兼統烽火南日活嶼銅山小垵五水寨把總中北南三路守備坐營都司標兵把總遊擊及所轄地方叅將各府衛州縣與各民兵等項俱聽節制調度如有司阻撓許指名具疏題奏得旨俞允悉如所議云

部署伍旅督防仙遊

先是朔日丙子倭舟十六艘登犯興化府青山巡檢司石城澳尋南下初二日丁丑倭舟一艘登犯晉江烏澗巡檢司爲耿宗元部下偵卒斬獲一倭次日戊寅又倭舟七艘復登上圳上澳與前烏澗

賊合黨屯在內坑等處本路署守備耿宗元督部下蔣思胡仲膏俞一和等兵爲前鋒俞廷秀爲左翼陳倉爲右翼三路齊進生擒二俘斬首七十三級奪獲器仗一百五十有九件餘賊南遁初三日又倭舟一艘約賊百五十餘徒突至福甯田澳登岸聞知漁洋有兵卽沿海奔南屏與前閩峽敗賊合黨遁福安甯德等處又倭舟五艘約賊三百餘徒從竿塘定海澳突至連江東岱澳登岸南奔木日奉軍門差捧旗牌往浙江催兵家嚴度賊結聚南下勢必覬覦仙遊於初四日巳卯會請軍門親

提各兵南下預發鎮撫葉應春部親兵二百人入
仙遊協守又行泉惠南安等處及沿海衛所各設
疑兵謹防次日庚辰家嚴偕監軍汪公督兵屯興
化府初六日辛巳倭舟一艘登犯惠安之小垵乘
夜突至東廓爲鄉兵斬首六級餘遁楓亭初七日
壬午原登石坵連盤南哨西港圳上後潘青山烏
湧小垵田澳及吉了石城上逕學前內坑等處敗
賊俱令至東沙移屯仙遊城下環攻仙遊者尙有
二萬餘分屯四門襄城且數匝矣時我兵未集不
可進戰家嚴乃先調胡守仁把總蔣伯清等兵至

近城鐵山據險爲壘與賊相持以牽其勢又選各營願出死力勇士五百名竊近賊巢不時相機率勦以分其勢又親統中軍親兵喊礮鼓噪倏忽往來以惑亂賊之耳目仍恐流突惠安先發烏銃一哨帶運火器入城協守又行署守備耿宗元撥義總陳應朝兵一枝同監軍汪公赴省防福雷之寇北犯省城令屯北嶺保固根本又調都司郭成嘉等兵由建甯襄路逐剿雷德之寇以杜深入又恐餘賊由連江過渡因開授方畧行署把總傅應嘉撥發中哨兵船設計誘敵見留兵三枝協同標兵

屯興化守郡城以防迎截陸續流寇十一日丙戌
原登犯東岱倭賊搶舟過渡從長樂流玻璃嶺欲
入仙遊合黨家嚴督朱珏趙記陳良琮等兵自興
化迎戰斬首鋒三級餘倭喪氣狂奔十三日戊子
遁涵頭出新浦適軍門發操兵陳其可等遇之合
戰共斬首三百三十有六級前倭盡絕時仙遊圍
急而縣尹陳公大有典史陳賢白嶺巡檢殷功雖
同效死守而火藥不足家嚴令官生高太平龔騰
霄王加麒親兵鄭希田舍邾世美等潛齎礮藥火
矢資夜縋城送進協守共計一百八十餘人每夜

更番出入接遞火藥間被殺傷郊世美等五名軍門又發義士揭宇等同入協守十七日家嚴又差親兵十名入城據高太平等揭稟城中有以和議者家嚴報軍門云從來以和爲議者率皆借和以緩之實則乘其暇以周悉謀慮治備戰守之具耳當急行該縣一面以和誘敵一面速治禦具嚴爲守備以待班兵庶不爲所誤軍門深然之自興化復後抵今纔兩月僅能振飭水兵提挈軍務粗有端緒而大寇紛然猝至守汛客兵僅六千餘地方廣遠勢分力弱況池嶼大石上迓三捷重傷者未

痊且當下班之期均有思歸之念眾寡不敵以故
家嚴惟欲多方撫諭諸士使之堅心留戍爲聲勢
專候班兵合力進剿而在湖有司皆胡越相視百
計阻撓沿途設禁不容入閩以致失期乃于十八
日癸巳選死士一百名陸續乘夜入城於時又有
倭舟一艘駕至南日山後峰澳閣淺顛折賊遣頭
目十八人小划過岸搶船不得蓋家嚴已先令監
軍汪公禁漁舟遠泊故也必欲入仙遊招黨接援
當夜聞報卽調發胡守仁統義總方其等兵邀擊
於泗林之下梁盡馘之餘倭尙屯南日山又行顧

喬自萬安所開船前來會勦又差中軍王講武生張進學等往佐之家嚴親率千戶張應龍義總錢國明平海衛指揮邱鼎實等部協合水陸夾攻二十四日巳亥顧喬水兵追入懸山生擒一十八夷斬首三十四級二十七日壬寅復生擒五夷斬首三級小埕署把總傅應嘉奉調至南日澳遇前倭督哨官許翰等堵截斬首四級餘孽逃入山谷又發千總屈元等同舍人鄉兵共擒斬一十五級福甯州原遁監德倭賊突入古田縣境原差偵卒沈賢守坑百戶吳彪同典史季權所領機兵共斬首

五級餘賊遁至仙遊合鯨時仙圍日急班兵過期
家嚴恐久困無援民心懈怠賊勢益猖乃復選部
下精兵六百人與義總楊文陳其可蔣伯清等兵
合營親統近巢石馬屯營潛蓄敵愾外假張疑以
牽賊勢石馬以南皆叢林賊多潛伏深入寡援兵
家之患不得已四面設疑使賊不得肆出剽劫亦
不得專意攻城故仙遊終保無虞又行小埕署把
總傅應嘉將水兵選充陸兵仍聽募足三千名同
所調原任叅將侯熙募兵三千五百名俱把截泉
漳等處防倭南遁因制木發煩數架皆鬆其後而

左戢藥鉛標爲守城之具示云能納城中者與百
金乃假將託諸縣而令路遇伏寇卽佯擲而還賊
得之喜遂用以攻城毋裂子發傷賊數百僉驚以
爲神

冬十二月水陸二捷大破四巢解仙遊圍

是月初六日庚戌賊見援兵久不至遂大肆攻擊
該縣官士民丁並協守官兵竭力防禦賊乃集選
鋒擁至西北水關砍木柵壞土牆設伏鳥銃勢甚
猖獗時生員施大銓堞夫林志寬尹家丁陳二俱
被銃傷墮城外賊已豎雲梯登城兵夫劉世芳吳

育邱世脩奮死殺隨倭賊世芳身亦被殲前撥遊
兵李以仁等殊死冒圍縱火將賊竹牌木梯盡焚
之勢少卻家嚴在石馬聞城頭風緊卽喊銃鼓噪
賊疑大兵至遂退十一日乙卯又倭舟七艘駕浮
鷺鷥洋本汛南日署把總顧喬督舟師追至烏姑
山外洋犁傾三艘沉溺四百餘徒斬首二十一級
十六日庚申浙江中丞委千戶胡奎贊畫生員金
文通同原催兵推官鍾公等督送上班官兵王如
龍等到省汪公督行福州太守胡公帛署縣事通
判任公良翰侯官尹任公春元備餉賞之遂委中

軍指揮盧鼎臣千戶徐棠百戶崔經縣丞王繼祖
等分營各辦軍火器械直指李公親犒賞督發同
遊擊李超齊赴兵營二十三日丁卯班兵既到分
守福甯叅政劉公佃興化太守易公道談莆田尹
莫公天賦等分營給餉中丞譚公詣營親填令票
號令俱聽家嚴專制仙城受困五十日尙得保全
不潰皆疑兵死士牽制之力居多也二十四日戊
辰家嚴集諸將指授方略刻期進剿先發義總孫
廷賢哨官王伯璽張邁王漢等竊由山僻入巢偵
路限二十五日己巳照令票各來導引大兵進剿

乃分布守備王如龍將左軍統領楊世朝丁茂朱
九龍等部以武生金文通督之署守備胡守仁將
右軍統領方其朱珥陳應朝婁國華等部以中軍
王講督之兩軍共取南巢把總陳濠將右奇率陳
祿陳文澄童子明張元勳等專剿東巢以武生晏
述督之遊擊李超將左奇率楊文陳其可蔣伯清
等部專剿西路以中軍徐棠督之坐營把總金科
將中軍大營正兵率葉大正陳良琮等專備策應
以武生蔣如松督之中軍吳京押火器隨軍接濟
而復以標兵指揮呂崇周副總金文秀領標兵一

枝同都司郭成苗兵四百張疑鐵山綴旒北巢之賊又以署把總傅應嘉統本部兵取道西嶺以拊西賊之背隨將進止機宜詳註號票分給諸將一曰二十五日辰時掌三號中左路王守備兵隨大黃旗至新嶺止壘中右路胡守備兵隨大紅旗至天光嶺止壁左奇兵李遊擊隨大藍旗亦至新嶺止壁右奇兵陳把總隨大白旗至水溝止壁各大兵在後一里外造飯一曰二十六日五鼓傅煇微明依路過山按圖進剿中路遇賊左右二奇便止齊以防抄襲中路進左右亦進中路追賊入巢左

右奇至溪濱止齊左防西門抄賊右防東門抄賊若果有抄救之賊許左右沖鋒剿殺如南巢已破賊東西奔竄亦許左右奇堵截之若東西兩門賊不出放任中路廝鬪左右不得擅動一日中二路剿滅南巢中左便由城下轉西門自裏向外沖突左奇兵自外向裏夾攻合剿西巢中右路便由城下轉東門自裏向外沖突右奇自外向裏夾攻合剿東巢一日第一緊要關防賊出巢埋伏巢之屋後小山皆伏藏之處兵至卽迎未接先退便是有伏不可徑進須巢外四山搜淨而後進一日聞賊

巢掘有坑坎釘鑊裝以木桶覆以草茅陷人今遇
有草覆土鬆之處以鎗槊檢路而進一曰中二路
兵共六總不可盡圍賊巢恐東西二門之賊不由
外路救援儻沿城過橋則左右兩奇焉能防範每
路各以二總打巢各一總屯向城邊要擋巢北南
門外大橋爲首功一曰今賊有四巢隔遠我兵只
攻一巢利在速進速勝若貪取財級必致誤事只
要亂賊塗地卽向前艾殺不尙首功惟依軍門賞
票沖鋒者倍之首級候賊滅另發兵割取通營均
分凡有持級報功者卽斬首並賊級懸示一曰凡

吹頭次海螺乃本府差人誘賊之意各兵不得驚
疑二次海螺方是進剿賊經鳥銃火箭勢多不待
交鋒必迴避入巢待東西門援賊至我兵兩顧方
自巢突出此是左右二奇並中二路各一總干係
克巢兵須用二總守定街口任是左右倭來別兵
廝殺二總不許動亦不可徑前湏止壁以待比日
約會章程申定號令遂於二十五日進兵野屯山
隩是夜霖雨如注及旦大兵自新嶺發行大霧凝
迷咫尺不辨蓋亦有天助焉辰時將抵城倭始覺
時賊正結隊攻城巧製呂公車八座高逾城堞丈

許三面蔽以竹木綿氈綢繆數匝內作層梯布階
匿賊百餘徒下用輾輪推近城堞車頂別駕飛橋
度越女墻城中人危在頃刻會大兵至中左路直
冲南巢倭遂棄車歇攻結陣而迎我軍王如龍奮
勇力戰中右路胡守仁齊進協攻賊大敗入巢各
兵力拔柵城圍然巢屋戮賊四五百餘遵令各不
取級悉聽焚燬餘賊頽奔東巢中右路乘勝追入
東巢右奇同進夾攻之東門係仙遊大路賊多選
鋒士卒殊血鬪隨破其巢中左路乘勝直取西巢
左部同進夾攻之初賊聞南巢已破遂落膽各退

據自保我兵皆虎搏鷹擊須臾三巢俱焚戮截已千餘其兩巢尙有數千併死沖突北走又殲數百餘孽狼狽與北巢併力死戰家嚴親督金科等奮擊大敗之其呂公車俱顛越於烈焰中矣乃收兵入城次發兵割取首級除焚燬外取倭首四百九十八級生擒通事一名奪獲器仗六百二十二件釋放俘係男婦三千餘人比時沖鋒者王如龍等陣亡者義總童子明等官生兵士二十四人署守備耿宗元發部下胡仲膏等協戰斬首十一級時敗倭尙有萬餘見大兵入城漸退數里三十日南

遁泉惠等處大兵退次俞潭本日縣尹陳大有梁士楚百戶張鳳挺等督各家兵鵬剿五十四級家嚴又委千戶孟松義總陳倉劉朝等眾搜山共鵬剿五十一級

巡撫都御史譚公請賞罰疏云比年征調浙兵剿平海寇往往以眾取勝一戰成功寇靡孑遺雖國威已伸而島夷未創賊膽未落乃今引倭大舉擁眾內侵意在抗我積威逞彼故智假令拘於常調時必持久而後集兵必相當而後戰境內之事將不支矣伏荷皇上予威默運於九重神武廣昭於

四表饑糧發天府之儲部曲盡人官之選以故事
無掣肘人皆用命乃能用寡擊衆一呼而輒解重
圍以正爲奇三戰而悉收全捷非惟禡外夷之魄
抑以寢內逆之謀蓋自東南用兵以來軍威未有
若此之震軍功未有若此之奇者是皆都督同知
戚某精忠殉國妙畧通神宦成而志不渝戰勝而
機益密徹桑於陰雨之先豫事而立射隼於高墉
之上好謀而成俘馘何啻千羣勞苦豈云萬狀部
中賴其保障居然衣冠文物之故鄉海外憚其威
稜久矣禮義詩書之宿將宜加上賞用答元功

戚少保年譜

卷四

戚少保年譜著編卷之四終